
КУЗГИ ШУДГОР - ҲОСИЛДОРЛИК ГАРОВИ

Фарғона вилояти ҳокими Хайрулло Бозаров жорий йил 23 октябрь куни Бувайда туманига ташрифи давомида тумандаги машина трактор паркида бўлиб, техникаларнинг ҳолати билан яқиндан танишган ҳамда техникалар сонини кўпайтириш, уларнинг иш унумдорлигини янада ошириш кераклиги бўйича топшириқлар берган эди.

Вилоят раҳбари берилган топшириқларнинг қай даражада ҳал этилганлигини бориб кўрди.

Тумандаги машина трактор паркида 9 та отряд ташкил этилди, ишчиларнинг шароитлари яхшиланди. 7 та вагон уларнинг дам олишлари учун шай ҳолатга келтирилди.

Механизаторлар билан учрашув чоғида вилоят ҳокими шудгор ишларини ўз вақтида сифатли бажаришга муҳим эътибор қаратиш лозимлигини билдирди. 15 гектар ҳайдалган ер майдони учун мукофот пули белгиланишини айтиб ўтди.

Шу куни вилоят ҳокими Ёзёвон туманидаги марказий трактор парки “Ёзёвон транс сервис” масъулияти чекланган жамиятида ҳам бўлди.

Вилоят раҳбари жорий йил 18 октябрь куни Ёзёвон туманига ташрифида техникаларнинг камлиги, марказий трактор парки ташландиқ ҳолатга келиб қолганлигини танқид қилиб, мутасаддиларга қатъий топшириқ ва муддат берганди. Қарийб бир ҳафта ичида туман сектор раҳбарлари бошчилигида марказий трактор паркига тубдан ўзгартириш киритилди.

Бу ерда 10 та отряд ташкил этилиб, барча шароитлари ичида бўлган 10 та вагон ҳам тайёрлаб қўйилди. Таъмирталаб техникалар, омочлар янгиланди.

- Бугунги масъулиятли кунларда барча шароитлар яратилиши лозим. Хусусан, техникалар замонавий бўлиши ва айни пайтда бир мавсумга етарли талаб этилган эҳтиёт қисмлар билан таъминланиши, ўғит ва ёқилғи таъминоти узлуксизлиги, ишчилар муносиб тарзда рағбатлантирилиши керак. Сабаби, бу ишларни амалга ошириш натижасида келгуси йил ҳосилининг мўл бўлиши таъминланади, - деди вилоят ҳокими.

Фарғона вилояти ҳокимлиги

2020-10-27 23:49:20